

## **Sanaartornermi ilinniartoqartarnek pillugu Namminersorlutik Oqartussat nalunaarutaat nr. 10, 12. juli. 2010-meersoq**

Sanaartornermi neqerooruteqartitsisarnek pillugu Inatsisartut inatsisaanni nr. 11-imi, 2. december 2009-meersumi § 35 naapertorlugu matumuuna aalajangersarneqarput:

### Atuuffia

#### § 1. Nalunaarutip atuuffii tassaapput:

- 1) Namminersorlutik Oqartussat sanaartugassaataat taakkunungalu pilersuinerit, ingerlatseqatigiiffiit Namminersorlutik Oqartussat aalajangiisarnikkut sunniuteqarfigisaat, kiisalu kommunini oqartussaasut.
- 2) Neqerooruteqartitsisartut allat, sanaartugassanut neqerooruteqartitsisut, pisortanit tapiissutinik pissarsisimasut, tassungalu ilaapput Namminersorlutik Oqartussanit tapiissutit, utertitsinerit, taarsigassarsititsinerit imaluunniit qularnaveeqqusiissuteqarnerit.

#### Imm. 2. Nalunaarutip atuuffigissassinngisai tassaapput:

- 1) Piginneqatigiilluni inissiat, sanatitsisunit namminersortunit sananeqartut aningaasalersorneqartullu, tamatumalu kingorna piginneqatigiilluni inissiaatillit peqatigiiffiannut tunniunneqartut.
- 2) Namminersortut inissialiortiternerat, Inatsisartut aningaasanut inatsisaanni oqaasertaliussat naapertorlugit taarsigassarsititsinissamik neriorsuuteqarfiusut.

### Neqerooruteqartitsisumut piumasaqaatit

§ 2. Sanaartugassanik minnerpaamik katillugit 3 millioner koruuninik nalilinnik neqerooruteqartitsinermi, neqerooruteqartitsisup neqerooruteqarnissamut najoqqutassani piumasaqaateqassaaq, atorfinitsinneqartussat ikinnerpaamik tassaassasut:

- 1) sanaartugassaq minnerpaamik 3 millioner koruuninik, kisiannili 6 millioner koruunit inorlugit naleqarpat ilinniartoq ataaseq.
- 2) sanaartugassaq minnerpaamik 6 millioner koruuninik, kisiannili 9 millioner koruunit inorlugit naleqarpat ilinniartut marluk.
- 3) sanaartugassaq minnerpaamik 9 millioner koruuninik naleqarpat ilinniartut pingasut.

Imm. 2. Ilinniartunik piukkunnartunik soqanngitsoq Piareersarfimmiit uppersarneqarsinnaappat, entreprenøri ilinniartunik imm. 1-imi piumasarineqartunit ikinnerusunik atorfinitsitsinnaavoq.

Imm. 3. Ilinniartut tassaapput ilinniartut, suliffinni misiliisut, pikkorissartut aammalu ilinniartut, Kalaallit Nunaanni sanaartornermik ilinniarfimmi ataatsimi ilinniagaqartuusut.

§ 3. Nalunaarut 1. august 2010-mi atuutilerpoq.

Namminersorlutik Oqartussat, ulloq 12. juli 2010

Jens B. Frederiksen

/

Steffen Ulrich-Lynge